



Impactful Women Project

IMPACTFUL WOMAN



Maybelline
Arends-Croes

Graduado di Conservatorium
di Hilversum, den Algemene
Muzikale Vorming.

Na 1987 a gana premio pa e miho obra
di aña, graba den naturalesa di Aruba "E pesebre bibo".

A dirigi coro hubenil "Tutti Frutti" riba
e dia inaugural di Aruba su Himno y su bandera
oficialmente den Wilhelmina stadion riba 18 di maart 1976.



Ken ta *Maybelline Arends-Croes* na banda di e mundo di musica ?

Banda di mi trabao como docente di musica y mi envolvimento den e mundo cultural/musical di Aruba, mi ta yiu (yiu mayor di Frans y dfto Aura Croes). Mi tata ta na bida ainda (102 aña y bon di salud). Tambe mi ta ruman (Mi tin 5 ruman, di cual Dorinda a muri 4 aña pasa). Tambe mi ta casa cu Lito Arends (14 Oct. 2020 nos a cumpli 50 aña di feliz bida matrimonial).

Mi ta un mama feliz y orguyoso mama di dos yiu homber (Carl & Igor) y un yiu muhe Giaïra). Carl a muri den un accident di auto na 1973. Mi ta wela di 4 nieto masha stima, tur ta mucha homber. Ademas mi ta un amiga pa tur mi amigonan. Mi ta contento di ta un ser femenino y agradecido na Dios pa permiti mi hunga tur e rolnan aki den mi bida.

Maybelline Arends-Croes tin hobby cu ta haci durante tempo liber/ priva? Sigur cu si. Mi tabata gusta lesa hopi, pero pa motibo di problema di mi bista (macula degeneratie di retina), esey a bira hopi dificil awo na grandi. Mi ta gusta traha kruiswoordpuzzel na Hulandes y traha Sudoku. Awo cu mi ta pensionado, mi ta traha diariamente cu mi matanan den mi hofi. Mi ta gusta bay concierto of presentacion di baile na Cas di Cultura. Mi ta gusta hunga carta (canasta y seguidiya), domino y wega di mesa, manera rummicup y mahjong. Actualmente mi ta hunga tur atardi seguidiya cu mi tata. Desde mi hubentud mi a cuminsa hunga volleyball (cu La Fama, Apollo y despues cu leraren groep di Colegio Arubano) y mi a hunga hopi bowling desde cu mi a regresa for di Hulanda (na Tivoli Club, na Esso Club y despues Eagle Bowling Palace) hunto cu mi casa, tambe den exterior. Mi ta gusta baila; mi mayornan a siña mi baila desde mi niñez y como adulto mi tabata tuma les di baile folklore cerca Astrid na Simadanza.

Ki estudio *Maybelline Arends-Croes* a haci?

Despues di a obtene mi H.B.S.-A diploma na Colegio Arubano na 1963, mi a bay studia musica na Conservatorium di Hilversum (1963 te cu 1968). Mi hoofdvak tawata Algemene Muzikale Vorming y como bijvak mi a tuma: Zang. Mi a obtene mi diploma di Muziek-Onderwijs Akte na 1968. Mi a traha na Colegio Arubano (1968 te cu 2008) y na Academia Pedagogico (A.P.A. y despues I.P.A.) di 1969 te cu 2008.

Mi tawata asisti na diferente conferencia pa music-teachers den exterior pa mi keda upgrade mi mes cu e ultimo desaroyonan riba tereno di educacion musical. Como cu mi ta trabao ta ensera hopi uzo di cancion, tambe cancion na Papiamento, mi a tuma na año 2010 dos curso di les di Papiamento na UNA, pa mi siña skirbi mi dushi idioma Papiamento mihor, segun su reglanan di gramatica y ortografia, desde cu el a bira idioma oficial di Aruba.

Con *Maybelline Arends-Croes* a cuminsa practica y drenta e mundo di musica?

Wel, mi ta bini di un famia musical. Mi abuelo di banda di mi mama ta e conocido pionero di musica folklore, tocado di fio, Sixto, miho conoci como Mo Tito Croes, kende a toca fio y dirigi su grupo Conhunto Folklorico Arubano te cu su 85 año. Mi tata tabata toca trompet den banda di fraternan den su hubentud y despues el a canta hopi año largo den coro mixto di Misa San Francisco. Mi mama ta gusta canta y baila. Tempo mi tawata mucha, nos tawata pasa tur Diadomingo cerca mi welonan na Sta. Cruz (Mo Tito). Tra'i merdia

Mo Tito ta pasa man pa su fio y ta cuminsa toca su piesanan. Mi omo ta compañ'e cu guitarra. E bisiñanan ta bini acerca y ta compan'e tocando cuarta, tambor of wiri.

Mi mayornan ta canta of toca wiri y ami ta scucha cu hopi atencion y gosa un mundo. Mi tata a regala mi un cuarta (na edad di 8 año) y tur Diadomingo mi tabata wak e tocao di cuarta na cas di mi welo y mi tabata purba pone mi dedenan mescos cu di dje y raya e cuerdenan mescos cu ne. Mi mayornan tawata tin un piano na cas, aunke niun di dos no ta toca piano. Na edad di 7 año mi a cuminsa ta "pingel" riba e piano y mi so tawata logra saca cierto melodia riba e teclanan. Mi mayornan a ripara mi interes y nan a dicidi pa manda mi les di piano y canto cerca Sra. Rhoda Steenhuisen y despues na Arubaanse Muziekschool. Como mucha mi tabata gusta scucha cantica na radio of for di disco, skirbi e letranan den un schrift y djey canta nan cu mi primana y amiganan.

Semper mi tabata gusta purba canta un tweede stem. Na HBS mi a cuminsa pensa riba kico mi lo bay sigui studia. Mi tabata duda entre docente di idioma Spaño of docente di Musica. Mi amor y pasion pa musica a prevalece y mi a tuma e decision pa bay studia musica. Mi mayornan a laga mi liber den mi escogencia y a duna mi tur nan apoyo pa logra mi metanan di estudio na Hulanda. Mi a haya un studiebeurs di Sticusa (Stg. Culturele Samenwerking [tussen Nederland en Ned. Antillen]).

Con *Maybelline Arends-Croes* ta balansa bida familiar y bida profesional? Esey mi a logra, danki na e pasenshi y tremendo cooperacion continuo di mi casa Lito. Nos ta plania tur cos delanta hunto y parti e tarenan como mayor responsabel. Mi tabata hiba mi yiunan cu mi na tur ensayo, unda cu tawata permiti esey. Anochi no, esey ta kinder bedtijd. Mi yiunan mes tambe a forma parti di mi gruponan di canto y mi a siña nan e base pa toca akkoord riba guitarra. Di chikito caba (5 año) mi a siña nan baila. Mi tawata laga nan para riba mi pia y mi ta baila cu nan, pa nan sinti e ritmo y e swing. Ora nan a bira un poco mas grandi mi tawata inclui nan den mi preparacionnan of intercambia di idea cu nan. Como mayor nos a percura semper pa 'quality time' cu nos yiunan. E cantidad di ora no ta conta, sino kico bo ta haci cu nan den e poco ora cu bo tin pa nan. Nos a percura pa haci semper hopi cos hunto cu nos yiunan den nos seno familiar. Musica, weganan di mesa, hopi deporte, auto rallies, traha disfras y road-piece pa participa den lighting-parade di Tivoli Club. Mi a haya bon ehempel di mi kerida mama, kende a traha como professional hairdresser pa 55 año largo. Nos tawata un famia hopi uni y nunca a sinti falta di amor, cariño of atencion di mi mayornan.

Cual ta tur e competencia nan cu *Maybelline Arends-Croes* a participa den dje? Y kiko ta tur e titulongan cu a logra conkista?

Ami mes nunca a participa como solista den competencia, pero si cu mi alumnonan di canto, kendenan tabata participa na diferente festival di voz y di cancion, tanto na Aruba como den exterior. Hopi di nan a sa di gana of termina como finalista.

Mi a fungi numeroso biaha como miembro di hurado pa festivalnan na Aruba, Corsou, Bonaire y na Puerto Rico. Mi a dirigi obranan musical. Na 1987 mi a gana premio pa e miho obra di aña, graba den naturalesa di Aruba y presenta na Tele Aruba, esta “E pesebre bibo”, storia di nacemento di Hesus. Tur aña nan ta bolbe pasa e video aki na Telearuba. Ta mas di 30 aña largo caba. Dos siman pasa nan a bolbe pas’e.

Tin otro reconocimiento/ logro na Maybelline Arends-Croes su number?

Cu mi 23 aña nan a elegi mi como Miss Tivoli y mi a bay riba un carosa grandi y bunita den parada grandi. Hunto cu mi casa nos a logra hopi biaha cay den e cinco top finalistanan pa auto-rally. Den bowling tambe mi a yega di gana den competencia na Aruba y djey bay representa Aruba den exterior, tanto na Miami, como na Costa Rica y Mexico. Como 10 aña pasa nan a elegi mi como Mama di aña na Misa San Francisco.

Mi a sali first runner-up den e prome eleccion di Mrs. Carnaval. Aña pasa a toca mi e honor di wordo corona como Pilar di Cultura na Centro di Bario Brasil. Mi a ricibi condecoracion royal como Ridder in de Orde van Oranje Nassau pa mi trabaonan boluntario den comunidad. Mi welo Mo Tito, mi mama Aura y mi ruman Sandra tambe a ricibi e condecoracion royal aki pa nan trabaonan como boluntario. Mi tabatin e honor di a haya varios dedicacion y homenahe. Tambe mi tin e honor grandi y inolvidabel di a dirigi mi coro hubenil “Tutti Frutti” riba e dia cu a inaugural Aruba su Himno y su bandera oficialmente den Wilhelmina stadion riba 18 di maart 1976.

Maybelline ta envolvi cu algun instancia caricativo?

Mi no ta miembro di un organisacion caritativo. Pero si mi a haci semper hopi trabao boluntario y gratuito den mi bida y te awe ainda. Tur e gruponan y coronan cu mi a dirigi den pasado y actualmente ainda cu “Tutti Frutti” y “Melange”, mi ta prepara y ensaya cu nan semanalmente sin cobra nan un cen. Igualmente mi ta yuda gratuitamente pa prepara solista y tambe forma y dirigi coro pa diferente festival, entre otro >> Voz Hubenil, Voz di Oro, Voz Supremo, OTI-festival na Aruba y Antiyas, Festilindo, Vozilandia, Tumberito, Festival di Merengue, Festival Himno y Bandera.

Mi ta yuda varios cantante gratuitamente cu grabacion di coro den studio of cu nan produccion di disco/cd. Awo como pensionado mi ta canta y toca guitarra regularmente como boluntario cu miebronan di grupo di 60 plus di “Honey Bees” di Dakota y a peticion cu gruponan di otro barrio. (di organisacion: “Movimento ta Bida). Tambe mi ta forma parti di “Brindis Musical”, un grupo di dama di 60+, cu kende nos ta ensaya pa bay toca y canta na casnan di cuido di hende grandi, Cas Marie etc.

Ki mensahe *Maybelline* tin pa e hende muher professional di Aruba?

Mi tin vario mensahe y conseho. Algun di nan tawata learning moments den mi bida.

- Sigui bo soñohan, purba realisa nan, uza bo cabes y actua cu bo curason. Tin bunita dicho pa esaki: “Those who wish to sing, always find a song” (Waar er een wil is, is er een weg)
- Scohe un profesion, no pasobra bo por gana hopi placa cu ne, sino pasobra e ta algo cu bo ta gusta, of tin talento p’e. Bo mester por traha diariamente cu alegria te dia cu bo baha cu pensioen.
- Haci loke bo ta gusta y gusta loke bo ta haci.
- Traha honestamente cu disciplina, respet y dedicacion.
- No envidia otro, sino aprecia otro y traha cu otro. Den union bo ta logra hopi mas.
- Tur hende tin nan limite y nan punto fuerte. Sa cua ta esunnan di bo.
- Nunca ta laat pa cuminsa siña algo nobo.

Do you know any [#ImpactfulWoman](#)? Send us her info!

As we let our own light shine, we unconsciously give other people permission to do the same. - NM

WOW Aruba
Women empOwering
Women
wowarubainfo@gmail.com
<https://www.wowaruba.org/>